

# Usiku ulivyoingia katika Kijiji cha kina Opio

Robert Ekuka  
Kiswahili






Hapo zamani za kale hapakuwa na usiku katika kijiji cha kina Opio.

Watu walilala wakati wowote ule waliposikia uchovu. Walifanya kazi walipokuwa hawajalala.

Siku moja Opio alienda kuwinda na mbwa wake. Baada ya muda mfupi, mbwa waliona paa wakaanza kumfukuza. Opio aliwafuata. Alikimbia kwa masaa mengi. Kila alipochoka alipumzika na kisha kuanza kukimbia tena. Lakini hakuwaona mbwa wake.





Baada ya siku nyingi alijipata katika kijiji kingine. Akaingia kwa nyumba moja akamwambia mwenye nyumba, “Nimekuwa nikimfukuza paa kwa muda mrefu na sasa nimechoka. Nahitaji kupumzika.”


Mwenye nyumba akamwambia, “Ebu keti upumzike. Je, ungependa pombe kidogo?” Kwa vile Opio alikuwa na kiu alikunywa pombe kidogo kisha akalala.



Alipoamka alishindwa kuona.  
Alifunga na kufungua macho yake  
mara nyingi. “Ulinipa kinywaji  
kibaya,” alimwambia mwenye  
nyumba. “Siwezi tena kuona  
sawasawa.”

“Hakuna kitu kibaya na macho yako yako sawasawa,” Mwenye nyumba alimwambia. “Ni usiku sasa hivi. Kwani hujawahi kuona usiku tena? Siku ikiisha, usiku hufuata.”

Opio aliuliza maswali mengi kuhusu usiku. Akapendezwa sana na jambo la usiku. Yeye na rafiki yake mpya walizungumza hadi asubuhi. Alikaa kwake kwa siku nyingine moja ili aone usiku ukiingia tena.







Asubuhi iliyofuata, yule jamaa, alimweleza Opio, “Giza likianza kuingia leo tembea kwenda kijijini kwenu. Ukitembea huku ukiangalia mbele usiku utakufuata. Hupaswi kamwe kuangalia nyuma. Ukiangalia nyuma usiku utapotea.”

Opio alifanya alivyoambiwa. Usiku huo alianza kutembea akielekea kijijini kwao.

Alisikia giza la usiku likimfuata nyuma yake. Alitaka kuangalia nyuma lakini hakuangalia.







Alipofika kijijini kwao, wanakijiji waliogopa. “Opio, ni ugonjwa gani huu uliotuletea?” walimwuliza. “Ni nini hiki cheusi kinachokufuata nyuma yako?” Opio akawaeleza, “Ndugu zangu kitu cheusi kinachonifuata kinaitwa usiku. Mnavyoogopa ndivyo nilivyoogopa pia.”

“Lakini hata nyinyi mtapenda usiku.  
Mwangaza ukija tutaweza kufanya  
kazi. Na usiku ukiingia  
tutapumzika.”



Na hivyo ndivyo usiku ulivyoingia kijijini kwa kina Opio.



# Usiku ulivyoingia katika Kijiji cha kina Opio

Writer: Robert Ekuka

Illustration: Wiehan de Jager

Translated By: Mutugi Kamundi

Language: Kiswahili



© African Storybook Initiative, 2014



This work is licensed under a Creative Commons Attribution  
(CC-BY) Version 3.0 Unported Licence

Disclaimer: You are free to download, copy, translate or adapt this  
story and use the illustrations as long as you attribute or credit the  
original author/s and illustrator/s.

**Saide**   
South African Institute  
for Distance Education  
[www.africanstorybook.org](http://www.africanstorybook.org)  
A Saide Initiative